

慶州李氏世傳寶鑑序

頃年予與闔宗既修世譜繼以纂世傳寶鑑其規樞條列則爲撮各派祖先之勳業道學文章節行科宦諸事蹟者也客有難之者曰已見於譜者無乃疊乎予曰似是然譜之歸重在於著世代繼昭穆也且又若干事蹟散見於篇帙之間後承之考覽誠未易瞭然故爲此也曰無或近於夸閎閎侈世德之文飾耶曰嗚乎傳不云乎祖先有善而不知不明也不傳不仁也蓋傳之原知也知之効傳也知與傳之間有一緊着語曰鑑々之義豈易言乎哉夫後之鑑在乎先而子孫之於祖先後莫後也祖先之於子孫亦先莫先也爲人子孫者讀其祖先之事蹟也惕然而思奮然而起曰樹勳業當如某祖

可也蓄道德又當如某祖可也學文章尙節行摘科宦
又當如某祖可也豈但知之傳之而已哉旣鑑於先而
必欲於己親見之則祖先勲業道德文章節行科宦之
蹟實啓子孫世々勲業道德文章節行科宦之轍也是
編之成予以爲吾宗之一大勸勵也非有意於夸閥閱
侈世德也客唯々以退遂綴其難說爲世傳寶鑑序
慶州李氏得姓一千九百一年壬申十月下澣華谷公
七世孫圭彰謹書